





# 香州居集

香草居集目錄

第一卷 詩一

辭家作三首

閩門夜泊

經虎邱

望洞庭山寄釋同岑

錫山飲泉水

贈其年

陳半雪席上作

高淳縣別蔣烏八

喜晴

采石山下歌

讀史九首

過金陵贈汪民部鈍菴

杏花村遇屈翁山攜妻子將還東粵二首

橫塘曲

登黃鶴樓寄懷故鄉諸子

岳陽守風

出洞庭望君山



香草居集目錄

第一卷詩一

辭家作三首

閩門夜泊

經虎邱

望洞庭山寄釋同岑

錫山飲泉水

贈其年

陳半雪席上作

高淳縣別蔣烏八

喜晴

采石山下歌

讀史九首

過金陵贈汪民部鈍菴

杏花村遇屈翁山攜妻子將還東粵二首

橫塘曲

登黃鶴樓寄懷故鄉諸子

岳陽守風

出洞庭望君山

伏波廟

辰州晚泊

普市

洪江驛

雪後登後崖

平越道中吳次文別

袁廣文索題新居

將之昆明畱別潘方伯張

觀察

酬別彭晉三

自碧雞關至黑龍潭置酒

奉贈胡怡齋先生

送朱總文陸粲兮之太原

己酉冬同張晦先副使自貴陽至昆明庚戌二月

即送回黔三首

康郎魚歌

點蒼石

普洱茶

檳榔

雞縱

馬金囊

昆明晚古三首

秋夜宿建業寺見一老僧詢之知為沐黔國故宮

監也為賦長句

送葉星公餞迎恩寺

送喻明府之水西

偕趙使君登慈雲山寺看

梅遲呂忝字不至

忝字席上懷查韜荒

別吳但小之閩中

第二卷 詩二

擬古六首

見新燕

題盧將軍新屋

雨霽王礎臣遇訪畱詠而

去柬寄報謝

春正六日同孫曉潮趙旭

野再遊鸚鵡菴和彭禹峯方伯壁間韻

初度感懷

滇南春詞

登胡鳧菴清暉樓

醉題寓壁

晚次羅錦山禪寺翫月憶雲壑

餞別莊一菴還沅州 方學士樓岡侍御邵村畱

酌干松厓書屋 長句答錢鑒濤

得家書哭海寧祝氏姊亡兼示諸甥

同里新詠 艷情

星回詞五首 并序 懷家兄武曾二首

六月晦日對菊 履畝雜詩

伯兄斯年再遊嶺南奉寄二首

送礎臣歸太湖 九日登昆明城樓

讀曹澹餘先生集賦短章奉寄兼謝點定客滇南

近詩

偕陳伯舉過曇花寺

夢周林於鄭文谿

觀獵

送劉秀才歸河內 謁諸葛武鄉侯祠

答李亦臨途次見懷 辛亥除夕和十唐人詩程

石門倡

第三卷 詩三

憶昔歌送朱丈湛侯歸里

楊升菴先生祠 臨漪草堂雜詩

送許爛石歸吳 夢歸故園作

舍弟書來促予早還因寄此詩

題且閒齋壁

聞亦臨已抵都門因寄

懷化南

遙和星巖雲壑春日過韓

非有新城別業三首

臥廬見梅花因憶故鄉朱園栽植之盛輒賦四韻

寄元臣辰始兼懷蔣曾策孔懋弘定夫兄弟

輓張晦先三首

關西老將歌

讀張禹山詩

寄懷茂斯補山約山諸叔

及天穀兄

胡公西征奉寄

贈鳧菴從軍

金沙聞捷紀事五首

詠竹

送茂泌北游

送許鶴沙觀察歸養

郊外觀荷遇雨二首

阿禧詩并序

武曾二兄久不得予消息

賦四絕句見寄依韻奉答兼訂明秋歸里之約

雜感十首

九日哭沈武功四首

中秋遇雨

過聖延寺

秋雨

尋甸州雜詩

錢秀才過宿書齋小飲

夜集汪記室齋

秋夜獨坐書懷

蓮

壬子冬接斯年大兄粵東

書兼示二詩乃庚戌客濟南作也

除夕前二日詠瓶中梅菊

酬吳東池司李

答又元見懷

簡雪懷

第四卷

詩四

洞庭絕句同仲兄作

秋夜集張學使署

黃絲曲

渡盤江

答韓將軍澱江見寄

秋夜同釋巖宗賦

走筆贈趙駿求

送白子

過靜樂精舍贈僧

竹

八月十五夜侍母家宴

九日飲明遠叔襲紫樓

甲寅元旦

人日潘次耕過訪

錢尋千畱飲草堂遲周白門不至

秦溪初度述懷即呈外父及諸內弟四首

集寥園從祖齋看梅

村居書懷

題繆天自隱居

朱十齋中對雨

同諸子集吳瞻兮齋懷繆天自都門朱錫鬯潞河

錢爾載膠城繆受茲及家伯兄皖口分十四鹽

讀徐大詩餘效西崑體

夏鼎生見訪有贈

項東井見訪以洞庭游草

牆東坐雪詞投贈

尋周青士不遇

社日偶成

清明七花歌

武原歸舟同錢尋千作

和曹倦圃先生春草詩四首



立夏日蔡遠士移酌周天昔村居

朱不為紫薇軒偶集 集錢尋千城南別業

香草居小集限韻 樹根羅漢筆格歌

答奕菴從祖 寄樓林上人

孟冬集半完圃夜話 耕閒莊次家兄韻

不成寐用前韻 除夕前一日趙天羽招飲

登北高峯絕頂同趙農部賦

宴田子綸員外宅同顏修來司勳曹實菴汪蛟門

兩舍人 宿遷道中

題畫牡丹 偕趙農部宿韜光寺

贈慈息菴正公 夏日西禪詠白蓮用韻

坐觀瀾菴 贈田子綸學使

懷遠士 寄查德尹

白門秋盡喜龔石坪至

游牛首山長句

第五卷 詩五

贈王石谷 龔蘅圃置酒梅樹下

梅窗為柯亭賦 題龔石坪醒釣圖

瞻園別詩和蘅圃 柳

紅葉 北山行

贈權關揚州趙恆夫 咏飛來白鷺

秋夜不寐懷故鄉作

香草居集目錄  
秋海棠十二咏龔蘅圃錢尋千同作

呂城口號

宿苻鄉

瞻園早春用白樂天新居早春韻

司馬坊新居十首

移居檢點箱匣見亡妻鈿

奩感賦

江村

夏日晚集瞻園分韻

憶武邱舊遊戲做皮陸體

寄龔雪坪四首

藍謝青有卜鄰桃鄉之意

末章落句及之堅其約也

宿白堍

病中喜朱文盎至時予將

北行

答沈南渟

題蘅圃倚擔評花圖

寄邵柯亭

常熟楊子鶴為龔蘅圃寫僧裝小影無錫華叟希

逸補二女執花侍左右取色空空色意題曰雙

是圖

題石湖雨泛圖

自題行腳圖

長句示遠士

淳化關

句容

丹陽

毘陵

無錫

龔方伯置酒墨稼軒時陳獨醉藍謝青初至同蘅

圃賦

懷沈山子

種梅同蘅圃錫鬯松媵文盎賦

寄徐子大孝廉

與朱文盎話別

渡江

滁州

過清流關蘄圃臥輿中未起

磨盤山

臨淮道中

次臨淮念秋錦家兄客濠上路隔一舍嘆相見之

難卻寄此詩

淮鯽歌和蘄圃韻

荒莊遇雪禁用銀玉瓊瑤粉絲鹽絮等字索蘄圃

謝青賦

宿州

龔石坪先十日行符離橋遇北使得已過荏平消

息

桃山驛

徐州和藍謝青韻

謁漢高帝廟二十韻

述懷和蘄圃

渡河有感

利國監

兗州書懷得九言十七韻

東灘早行

汶上謠

輿中對月

河間用龔蘄圃贈朱文盎

韻呈都門舊識

過任邱懷龐雪崖檢討

趙北口

詠羸車

書懷和龔蘄圃用放翁韻

重九前一日徐勝力檢討招飲

為沈融谷題茶星閣

閣伯詩人日招集碧山草

堂時令嗣復申從山右至

送補山族叔南歸

燕京踏燈詞和沈南疑韻

題南疑詞卷

題高澹人江村垂釣圖

題秋錦兄剝舫兼示元汎姪

初冬將適桂林道經長沙喜晤程南陔先生於琴

鶴堂率賦志別 早春對雪

徐秋田新居 仲春花南小酌和陳書崖

韻 題林逸萃垂釣圖

浦口

按滇南詩三卷為手定之本自第四卷至末歲月無考有前後失次者今仍原藁編錄不敢易置 元姪孫旦華識

香草居集目錄畢

香草居集卷一

嘉興 李符 分虎

詩一

辭家作三首

湯湯夜將旦旭日耀高岑鑽火治朝食盥手抱宵衾別  
母非子願辭兄傷我心斑斕換征衣壘篋有絲音窮爰  
趨異谷野鶴出故林歡酒未盈觴離懷故難任

良朋篤友愛相送河之渚黃鳥啼綿蠻紫燕飛差池牽  
裳不忍別攀折楊柳枝芳樽傾魯酒雜佩遺江蘿既逢  
絲竹饒復惠琅玕辭不惜遠行役所慮昭質虧連車漢  
庭謗抱璧秦王欺保身效先哲蹈世避虞機嘉意均有

香草居集卷一  
一  
託炯言良足持青門承昔宴河梁繼前徽音容雖暫隔  
金石恒不移盍簪續良會三載以爲期

倣裝及筦月驅車越桑梓林梅方結青谷蘭已謝紫候  
改青陽終物變朱明始五兩俟昌風雙槳動江汜朝搴  
芳杜行夕擘宿莽止容與洞庭濱徜徉漢川裏支劔登  
黔山竦轡指昆水畧地蠻荒通受經文教起遐征慙昔  
賢周遊弔前趾旅人厭征途勞歌思陟岵峴眷茲父母邦  
信宿出攜李

閩門夜泊

客路行將遠鄉心殊未央南風今日便一夕到吳閩夜  
火鄰舟乞春壺酒肆嘗闔閭城外柳攀折總淒涼

經虎邱

記得年年待月圓秋風擬放虎邱船只今春雨蘼蕪綠  
畫舫何曾斷筦絃

望洞庭山寄釋同岑

鴛鴦湖上從君別阻絕音書已隔年怪殺莫釐峯下過  
相思不泛洞庭船

錫山飲泉水

晉陵斜日晚風緩放舟遲花發春申浦雲迷泰伯祠泉  
源探石穴茗椀啜仙芝此味由來少前途有夢思

贈其年

清和四月風光好客遊初指延陵道陳生兄弟中丞孫

香齋集卷一  
聯翩儒雅知名早。吳越曾無千里程。相思十載迷芳草。  
昨朝鼓柁五雲遊。惠連雅愛相攀留。聞君結廬近山郭。  
逆浪重登罨畫舟。門對荆南萬仞山。清潭玉女留潺湲。  
解鞍繫馬垂楊下。遊子初從汴水還。庭前落花猶不掃。  
征衣未改風塵顏。去年君作燕山役。曾與予兄稱莫逆。  
因之攜我補袍篇。予文名補袍集遊梁徧示平臺客。今日相逢  
如故人。殷勤拭拂山中石。明發孤篷雨滿林。片時握手  
重知音。離鸞別鶴各有曲。感君爲我彈瑤琴。遙知萬里  
滇南路。別後相思江水深。

陳半雪席上作

荆南樓閣雨中登。客裏銜杯酒不勝坐。對煙霞空楚澤。  
臥遊圖畫徧吳陵。庭前修竹啼幽鳥。門外青松覆古藤。  
清話不知更漏永。幾迴風起亂篝燈。

高淳縣別蔣烏几

風吹夏雲馳南浦。春將歇坐對青山。波綠樹亂鳴鳩我。  
登白門車君上宛陵。楫十日同遙征。何爲復離別聚散。  
若萍花憂心忽如掇。

喜晴

離家十日雨。今始見朝暉。深樹鳴鳩歇。高樓乳燕飛。輕  
紈裁夏扇。細葛換春衣。綠徧王孫草。鄉心夜夜歸。

采石山下歌

采石山前酒肆連。客遊悵望西南天。風生潮擁金陵樹。

香草居集卷一  
落日帆收姑熟船憶昔青蓮醉遊處身著宮袍詠佳句  
牛渚清歌月夜聞扁舟曾泛謝將軍往事須臾變今古  
風流貴客皆黃土山上猶餘捉月亭舟前尚識燃犀浦  
灼灼山花照眼新團團江月白如銀江花江月無終極  
把酒清宵愁殺人

讀史九首

沛公西入秦成功藉羣勇裂土分珪爵將相寧有種烏  
盡良弓藏一朝失隆寵斬西逞精兵敗北不旋踵韓彭  
爲俎醢諸侯皆震恐獨有種瓜人全身在田隴  
尺澤難奮鱗神龍困豫且志士遺草澤誰能別賢愚發  
言獲讒謗舉足嬰禍羅衰偃昔從亾曹衛同見疎夷吾

未爲卿桎梏還齊都自昔賢志士未達多艱虞璞玉藉  
雕琢乃能成璉瑚大雠不反兵小怨視若無睚眦必相  
報張祿誠鄙夫

長卿善讀書結髮事漢皇散職非所好謝病游大梁歸  
來益貧困滌器酒壚傷王孫重貨財安能禮賢良召入  
賦上林朝奏夕爲郎建節使蜀都觀者儼成行小人慕  
勢位君子重文章遺草雖寥寥篇翰有輝光

安漢託符命居攝旋即眞金刀不爲利皇綱忽沉淪當  
時頌德者皆得據要津劉歆旣受爵子雲亦美新梅福  
在下位投簪謝家人變姓隱吳市遺榮若埃塵爲仙即  
莫考高節已殊羣

香草居集卷一  
山溪百獸往人當仁義集王侯尚患貧賢者猶貨殖貪  
夫徒藉口趨利遺道德馬醫得擊鐘灑削亦鼎食南國  
有貧士熒熒最蕭瑟好讀柱下書恥學白圭術藜藿可  
療饑終身自悅懌

拘學抱尺義與世無重輕旦暮老巖穴湮沒誰見稱何  
如游俠輩慷慨忘死生朱家重然諾意氣陵公卿陰脫  
季布厄飲德不自矜雖不軌大道布衣垂令名

紵衣贈季札編帶獻鄭僑結納慎所擇百年如一朝廉  
藺離復合由來重素交耳餘不相能後世徒見嘲白璧  
投河伯信誓指波濤歡愛鮮克終棄擲如鴻毛惟有崇  
明德庶幾可久要

干將苟不利宰割難爲功蟠木爲乘輿所貴有先容食  
其非狂生白首氣猶雄一出取陳留再出下山東儻無  
騎士薦淪落監門中

南粵未稱臣樓船下海隅功成拜列侯聲名震八區陸  
生先奉使仗劍乘單車片言去黃屋翠羽貢西都歸來  
無封爵食祿千石餘乃知守章句不如荷戈及寄語天  
下士且讀孫吳書

### 過金陵贈汪民部鈍菴

長洲民部東南美早歲芳名滿人耳坐擁圖書枕玉函  
招延朋舊盈朱履當年對策動朝端金門視草天顏  
歡宮城月上鳴珂入禁苑花開拂袖看承恩卻賜青團



香草居集卷一  
五  
扇丹書捧出麒麟殿近屬司農領國儲曾隸秋官理邦  
憲暇日揮毫迅若飛一紙傳出傾城知竒文早重韓陵  
石黃絹仍題孝女碑更有詩篇妙無敵銀甕天球世難  
識王韋絕調許重論鮑謝風流未衰息今年奉使秣陵  
城秦淮渡頭春水生里門爭識相如傳畫舸如看博望  
行客游將指昆明道稅鞅鍾山對芳草豫愁津鼓漸催  
人瞻望雲亭苦不早度支旌節石城開愛客何曾放酒  
杯華月從遊那忍別江頭繫艇且遲迴

杏花村遇屈翁山攜妻子將還東粵二首

故人騎鶴華陰回攜得秦家弄玉來挽鹿將歸珠海曲  
吹簫並下鳳凰臺登臨湯飲千杯酒詞賦真成一代才

君向羅浮我雲夢雙帆齊指大江開

白下青山亂夕暉莫愁湖畔送君歸能將錦鯉調中饋  
不獨金觴進綵衣南海仙人思鮑靚番禺孝子重羅威  
關山遊徧高堂老願爾還家只掩扉

橫塘曲

朝來策馬城南路好鳥間關雜芳樹佳人十五怨陽春  
勸飲壚頭日將暮杳杳橫塘一水斜蘭舟蕩槳未還家  
清江兩岸東風起飛盡楊花復柳花

登黃鶴樓寄懷故鄉諸子四首

夢遊昔日思黃鶴今日登樓憶故鄉望斷吳山那可見  
煙波愁殺楚天長

高棟晴雲冉冉輕江風吹落武昌城離逃一片晴川樹  
總惹離人怨別情

願借雲中黃鶴去天邊招我平生親相期共采仙人棗  
高臥樊山九曲春

樓頭玉笛數聲殘樓下滔滔江水寒水底雙魚日東下  
相思一報故人看

岳陽守風

昨發竹林灣忽達岳陽樓今日風波險阻我遠行舟岸  
驚重疊浪壤錯縱橫溝振衣升嶠迴縱目曠望周天經  
懸翼宿地脈聳巴州襟帶太湖勝控扼長江流凝神發  
藻思壯覽兼冥揆旣懷夏后德復憶楚王遊雲夢自長

在章華不可求韶顏改春華人命如蜉蝣棲棲何爲者  
臨睨思舊邱

出洞庭望君山

岷峩積雪消洞庭水涵虛南包星沙域北亘巴陵墟波  
濤浴日月江漢爲溝渠舟師駕楚榜旅客操吳歛乘流  
木葉下挂席涼風徐中有十二峯俯瞰千里區帝子猶  
未降神靈安其居懷精誰結言捐佩空踟躕安得麾蛟  
龍梁津使涉予

伏波廟

清浪灘前廟淡藏翠巘中船人薦雞黍客子駐孤篷新  
息封猶薄雲臺望益崇盧溪和吹笛千載憶雄風

辰州晚泊

石穴書何在空餘二酉山  
平田農飲散極浦釣船還  
太守出行部孤城早閉關  
當時立銅柱辛苦服諸蠻

普市

江路晚蕭瑟船頭涼雨過  
山程黔路近賈客蜀人多  
夜久生殘月風微緩去波  
客眠長獨醒飄泊奈愁何

洪江驛

五溪長年者駕舟如弄刀  
穿石溯重灘十日猶堅牢  
晚次洪江驛日落星宿高  
傷水治夕餐榜歌喧塘均  
征邁非一途逆旅日滔滔  
前有皇華使鳴鏜肅旌旄  
後有商賈人言利爭秋毫  
遠道各有以涉險輕波濤  
顧我獨何

爲皇皇隨爾曹中夜不能寐  
反側心鬱陶

雪中登後崖

嘗讀黔中志後崖有竒跡  
客遊經黎峩溪冬訪泉石控  
勒懷寒冰衝風禦狐腋漸見  
瀑布流照耀積雪白況迺  
梅花開飄落同一色舍騎憩  
長松捫蘿登絕壁舉手掬  
浮雲靄靄沾衣溼恍若遇洪  
厓翩然來姑射始知羅施  
間亦有仙靈宅

平越道中吳次文別

昨夜黃絲店同看山月斜  
今朝忽分手憐我在天涯  
白舫乘歸客青春可到家  
西陵舊書屋待爾是鶯花

袁廣文索題新居

香草居集卷一  
八  
天南司鐸宦遊經華屋臨流傍井星愛客頻移徐穉榻  
開尊如坐子雲亭疎簾高捲秋雲碧畫閣遙看晚岫青  
我欲從君同嘯詠柴車數向柳門停

將之昆明留別潘方伯張觀察

偶逢名飲駐征鞍不覺山城生暮寒共說安仁能愛客  
眞逢京兆善居官笙歌今夜銜杯數雨雪前途逼歲殘  
西去山高行未遠外臺旌節舉頭看

酬別彭晉三

保障黔陽五馬尊每聞善政出君門幾登雲閣看圖史  
又別寒天對酒樽客路將尋六詔遠蠻煙遙接萬崖昏  
平生最愛佳山水他日遊踪好共論

自碧雞關至黑龍潭置酒

良辰三月好煙柳萬家迷駕言出城曲驕馬一羣嘶昔  
有青鳳鳥飛來山之西滇人不相識呼鳳爲碧雞碧雞  
去已久關前鳴黃鸝客行覽舊踪傷心草萋萋晴嵐逼衣  
袂引我轉迴谿谿斷路忽窮上有法王宮龍潭環其左  
錦鱗游當中波清淡見底相照山花紅春芳不再豔瞬  
息零飄風安能不讌賞而與俗子同且聽玉笛奏莫使  
金尊空夕陽促人還醉倒扶雙童歡樂猶未足放歌昆  
明東

奉贈胡怡齋先生

鞠旅南征劔氣寒雕題淡入獨登壇指戈辛苦標銅柱

香草居集卷一  
九  
草檄從容據馬鞍不羨虎頭名早著定知麟閣畫非難  
一時勳業歸驃騎旄節星旂萬里看

連雲甲第枕昆明別院樓臺瞰碧城檻外有花皆入鏡  
簾前無樹不啼鶯金尊夜泛平清閣畫角春閒細柳營  
乘興有時攜綵筆右軍書法看縱橫

良辰清讌數登臺玉笛橫吹亂落梅染翰詩成方鮑謝  
曳裾客至盡鄒枚夾池修竹仙禽下繞館生香玉牖開  
皇甫肯迎縫掖士壺觴嘯詠願趨陪

送朱總文陸粲兮之太原

策馬遊三晉離筵及暮春難爲萬里別況復故鄉親路  
出清漳遠杯銜白墮新秋風來塞外慎勿念鱸蓴

己酉冬同張晦先副使自貴陽至昆明庚戌二月

即送回黔三首

寒月辭鈴閣衝寒並遠征滇雲千萬疊宛馬後先行客  
館開尊共縑袍受雪輕南方春候早花柳徧昆明

同日來天末新年接舊年寧知金筑遠仍對絳帷前愛  
我爲長句隨君若比肩客樓煩顧步登眺共留連

蠻花春晝落火樹上元殘招飲同吾友

謂鑿濤素士也論文入

夜闌風流當代數嘉會古今難欲託千秋後良遊莫浪  
看

康郎魚歌

撫仙湖頭產嘉魚康郎名載方輿書苴蘭城中昔滿市

漁人籠挈來街衢我來南土兩經春  
 枯者間得艱鮮新有客昨放激江棹  
 餉我千條白錦鱗銀鏤玉琢色可愛  
 短不盈尺頭尾勻當筵不用鸞刀切  
 雕盤烹出香椒辛巴西丙穴浪高價  
 甌東石首徒垂綸松江鱸膾吳江蓴  
 吾鄉美味稱絕倫萬里遠阻莫入脣  
 何期逆旅食異珍罷彈長鈇且逡巡  
 行沽濁酒漉葛巾持魚把杯夜及晨  
 點蒼石

片片蒼山石良工礪作屏渾如右丞畫  
 何藉侍中銘變化成天巧光華得地靈  
 珍奇今不貢絕少鳳凰形明萬曆時

為兩宮鋪地詔采鳳凰紋石

普洱茶

穀雨黃芽好春山采摘忙馬卿應試飲  
 陸羽未曾嘗刀削青團小杯沉翠片香  
 雖非龍鳳質消渴覺清涼

檳榔

擘開青玉顆供客當烹茶嶺表形差異  
 元江種最嘉手中調白雪口內吐丹砂  
 辟惡消炎瘴吹香壓苑花

雞縱

鮮帶黃梅雨乾浮白井鹽香芹和玉筍  
 此味美能兼洗盞沽桑落調羹漑釜鬻  
 不須頻割韭卻勝庾郎廉

馬金囊

方物蠻鄉重遺人但一函客途堪解渴  
 童穉喜分甘果異紅樓擲香輸粉署含  
 他邦應鮮識只合貴滇南

香草居集卷一  
昆明覽古三首

東登金馬山高岡委榛蕪神靈安可致漢武一何愚空  
悲王子淵持節喪道途

昔有苴蘭城莊蹻王時築俛仰感衰興停驂縱吾目遺  
跡渺何處土人種麥菽

滇池五百里湯湯接長天當日彩雲生照此池上蓮蓮  
花至今開雲散已千年

秋夜宿慧建寺見一老僧頭白如雪聲音如女子  
異而詢之知為沐黔國故宮監也遂叩其遺事  
為予道之甚悉聽畢愴然為述長句

金風瑟瑟涼秋至客子夜宿慧建寺白頭老僧夜不眠

為我滾談黔國事自言乃是刑餘身少小曾為宮裏人

曲房深苑逶迤入皓齒明眸歌舞頻玉鳳銜鈴聞異響

金龍吐佩承香塵第宅非由一朝建分茅始自功臣宴

鐵券頻頒朱邸門璽書數下明光殿二王一侯九國公

尚有將軍不襲封子孫傳位十數世勳爵食祿三千鍾

武僖之後愛文詞徼外烽煙靜一時滇池長讌書生客

阿瓦猶傳都督詩

阿瓦國王每夏五月以舟師會諸小國於江上都督沐璘作詩曰蛇首樓

船十丈長船頭鑊鼓樂笙簧篙師百櫓齊搖去阿瓦城邊水似湯滇人至今誦之

崇禎年中亂

離始臨安長官謀不軌倉卒橫戈樽俎間須臾拔劔宮  
門裏從官衛士不敢前樓臺灰燼鶯花死陳焦夫人竄  
西門一旦自焚普吉村可憐兩世金閨質化作千年玉

香草居集卷一  
女冤上公初遁瀾滄遠一去緬夷不復返曾聞就義死  
從容至今傳說多哀輓聽君說罷涕交流一門盡節真  
難求三百年來事銷歇卻恨當時沙定州獨倚繩牀三  
太息珠斗闌干月將匿篝燈黯黯不能寐清夜如聞鬼  
神泣

送葉星公餞迎恩寺

捧檄皇華歷歲年今朝相送百蠻天夕陽山寺來飛蓋  
細雨疎花繞別筵黃鶴重經停畫舫烏衣歸去問桑田  
星軺更向燕臺北知脫鷓裘酒肆邊

送喻明府之水西

昔日三苗叛王師十萬趨累朝無討伐一戰拓邊隅地

險分新郡君行實壯夫故人開幕府不必念尊鱸

偕趙使君登慈雲山寺看梅遲呂忝字不至

綠駟衝開沙岸滑青袍光映海波分數峯蒼翠當蕭寺  
四坐詩篇盡錦雲花底銜杯香不散澗邊流水響徐聞  
從游勝侶皆沉醉只少高陽對使君

忝字席上懷查韜荒

策馬城南門蕭條日將酉言尋歲寒居逆旅亦栽柳主  
人跣足迎嘉客坐我右不計醉尉呵索飲高陽酒共數  
金石文忽憶平生友牂牁爲河梁歲月聿云久尺書昨  
日至知發漢沔口蒲帆疾如掃歸省白髮母花溪攜李  
田秉耒未得耦高堂勤倚閭蘭室怯舉白轉恨萬里游



香草居集卷一  
三  
晨昏違瀟滂當年酒鑪側揮毫酌大斗讀書違衆尚埃  
塵視組綬家貧興益奢黃金恥在手里門同學者輕肥  
若某某笑指謂狂生爾我皆曰否人生各有志出處異  
抱負矧此七尺軀旦暮成白叟修身而立言庶幾期不  
朽何能守故廬持籌計田畝山水發文章冀窮州有九  
因之嘆辰參昔樂誠不偶粲粲斗移柄皎皎月當牖懷  
人一長嘯黑夜魍魎走

別吳但小之閩中

駿馬驕嘶不可聽雕鞍光照晚山青詩成此日難爲別  
杯映寒花酒莫停玉版初題金碧頌仙槎又拂斗牛星  
延陵姓字人皆羨知有羣賢候暢亭

香草居集卷一終

香草居集卷二

詩二

擬古六首

嘉興李符分虎

美人居高樓不畫雙蛾眉冶容本殊衆豈在膏沐施當  
春忽有懷手攀芳樹枝盛年暮昏姻情至非邪思欲適  
無良媒坐嘆青陽馳幾愆天桃節不賦褰裳詩

野蘭被孤桐上古軒轅作囊以葡萄錦青絲為約束齋  
糧涉東海遠從異人學三年得成聲解操咸池樂良質  
託美手聽者滿階閣一彈興玄雲再鼓翔雙鶴瓠巴與  
師襄千秋兩寂莫高調徒自知誰能辨徵角抱之歸淡

山逍遙獨娛樂

越客厭扁舟願言駕騏驎西行望秦關長楊夾廣路巍  
巍甘泉宮鬱鬱新豐樹雞唱青門開車塵若煙霧立談  
取功名朱紱易韋布人爵苟道得顯榮亦所慕周行直  
如矢我游獨窘步中道無饗殮且獵南山兔

海燕識舊巢林鹿戀山陽人生在逆旅能不懷故鄉故  
鄉渺何所茫茫限大江涯涘廣以濶黿鼉難爲梁升高  
而遠望遊子情孔傷三載一征衣思婦昔寄將經時弗  
浣濯垢敝闇無光爲念閨中意未忍棄道傍

春芳嬌白日阿儻臨大道天風從東來吹落同枯槁俛  
首拾殘英愛之未忍掃我有桃花顏鏡中不長好手挈  
白玉壺沉醉須及早何爲舍樂方戚戚傷懷抱  
千金狐白溫不如芰荷衣易牙調山膚不如精瓊糜夙  
昔慕神仙去登緱山陞山上何所見草木紛離披雲中  
王子喬吹笙來何遲昇天事荒誕躑躅生狐疑服食鍊  
玉液久爲賢聖嗤修名苟不早長年將奚爲

見新燕

海燕忽來到飛飛東復西花林沾社雨芳徑啄春泥纔  
逐迴風上還尋曲檻低盧家何處是應憶玳梁棲

題盧將軍新屋

皓髮蒼髯舊貳師天涯新築但茅茨渡江擊楫已陳迹  
抱甕灌園宜此時北郭青山遙對屋西鄰碧樹俯當籬

清池白石銷憂地長欲從君坐詠詩

兩霽王礎臣過訪留詠而去東寄報謝兼約偕遊

太華

爾著王喬履衝泥出郭來竟題佳詠去不把索郎開夕  
照全收雨淡林未落梅明朝尋太華絕壁掃莓苔

春正六日同孫曉潮司李趙旭野明府官素士劉  
季仲兩別駕再遊鸚鵡菴和彭禹峯方伯壁間

韻

山色周遭亂日暉青青細草坐承衣天涯長得同攜手  
客裏能忘賦采薇芳樹含花當徑發春禽銜果傷人飛  
臥遊定憶茲山好彩筆須圖一幅歸

初度感懷

王正月將望攝提貞孟陬東風方解凍春色滿平疇憶  
昔皇覽揆三十有二秋主人出為壽情好何綢繆承筐  
惠嘉貺張宴羅庶羞長揖前致詞賤子異時流此禮非  
古設況我未白頭受餐反加璧庶幾兩無尤酬酢忽已  
醉追往生繁憂吾家全盛日紛華擬王侯冠蓋聯翩起  
軒車夾鳴騶房櫳何宛轉珊瑚為簾鉤吳姬發清簫趙  
女彈箜篌予生方有知不屑辨麥蕤戲弄雙明珠擲地  
不再收六齡誦國風慨焉慕西周是時憂板蕩豺虎縱  
橫愁大父急王事戮力殉東牟我父在衰經誓報黃巾  
讎散家求死士□□亦來游金盤白玉箸會食如山邱

香草居集卷二  
三  
談笑樽俎間同室操戈予仗劍計不就采藥登羅浮衰  
鳳不復還鷓鴣鳴啾啾覆巢幸完卵伏櫪悲驂騮凜奉  
先人志勿學商賈謀瓶罄乏斗儲采藿爲乾餼猶恐辱  
遺訓努力勗前修孤介實性成竊慕巢與由昨欲訪名  
山散髮乘扁舟遠遊南服外故人投轄留入幕亦偶然  
豈真善運籌梅花若瓊瑤近我所居樓憔悴不堪折片  
片落庭溝客子仝飄零命駕將安投願言反舊鄉濯足  
河之洲鑿田種雕胡夏葛而冬裘足以娛高堂此外復  
何求

滇南春詞

春登隄岸廢何年。九曲虛聞載酒船。惟有素馨花不改。

紅羅摘去換青錢。

朱邸東連菜海子。人言此勝越西湖。垂楊一色碧波裏。

風景春來似畫圖。

檳榔嚼碎似珊瑚。大婦前行挈小姑。西寺景多東寺少。  
南門人衆北門無。

金馬山前白骨堆。長埋俠少控弦材。家人澆酒哭寒食。  
盡坐桃花馬上來。

城西新築兔園成。臺榭禽花不記名。宮監每禁遊女入。  
隔牆高樹但聞鶯。

昨日迎郎歸化寺。今日送郎滇海邊。海水拍天風又逆。  
願郎乘馬莫乘船。

香草居集卷二  
四  
雲津市上已斜陽金線鮮魚尚滿筐小婦數錢齊買去  
背人作膾勸郎嘗

重關別苑起歌樓六郡良家繫紫騮盡道姑蘇新樂部  
短簫橫笛異涼州

青樓大道綠楊多中有紅顏似素娥不學秦箏和趙瑟  
尊前只唱采茶歌

蠻女簪花拍手招齊來山上伐松條春淡敲火燒阡陌  
不種甜禾種苦菽

滇南正月如三月李花桃花開滿城待到花朝花盡落  
未逢上巳葉全生

近華洲畔草萋萋謝豹鷓鴣春亂啼白菜青螺傳家酒

祇應日日醉如泥

登胡鳧菴清暉樓

樓外春隄一水斜渾疑蕩漾鏡中槎女牆曲抱參差樹  
疊嶂平分遠近花天末相看同汗湯家山何計問桑麻  
仰捫牛斗星河近一片鄉心到若邪

醉題寓壁

滇花如雪覆金杯吳苑寒梅開未開自悔三年違故國  
不因貪看碧雞來

晚次羅錦山禪寺翫月憶雲壑

朝別麗正門暮次嵩明野前望羅錦山古寺在其下愛  
茲泉石好聊以秣吾馬禪房但容膝蒼藤覆碧瓦信宿

香車居集卷二  
五  
只暫安何用求廣廈日落衆鳥歸爭棲聲啞啞步出空  
庭隅明月林間瀉清輝若可餐手爾不盈把獨立久徘徊  
誰可與語者因之憶良友昨夜同杯筍高樓秉華燭  
各醉顏如赭君發江南曲淵乎奏大雅睥睨旁無人放  
情獨瀟灑朝來忽岐路流光不我假一夕長相思滔滔  
如孟夏入室援鳴琴離憂未能寫

餞別莊一菴州佐還沅州

莊烏久仕楚越吟思若邪循良推佐吏辛苦使天涯來  
踏春前雪歸看江上花鄰舟有商女慎勿聽琵琶

方學士樓岡侍御邵村留酌千松厓書屋

桐城兄弟並風流沙塞歸來已白頭解組久違青瑣夢  
驅車遠作碧雞遊堂前客到停書扇花底尊開不典裘  
醉後愛尋山石坐斜陽冉冉下西樓

長句答錢鑒濤

去年十月朔風吹停驂作客嚴寒時貴陽太守招我飲  
壁間讀爾琅玕詞今年更走昆明道與爾相逢苦不早  
天末同攜柔翰游花前數把金尊倒憶昔君歌行路難  
萬里牂牁寄一官從軍且著仲宣賦佩印欲登淮陰壇  
豈意滄桑人事改徵外浮沉將十載腰下青萍光不渝  
袖中黃石書猶在英雄失路安足愁握手相看尚黑頭  
丈夫志不在溫飽壯遊亦念尊鱸秋昨朝言別五華側  
柳湖之濱問家室何年與爾謝塵網同歸由拳種稻秫

得家書哭海寧祝氏姊公兼示諸甥

兄弟皆行役遙憐伯姊存曾遺大雷札藉慰北堂諼豈  
意鱗魚到翻令涕泗緜客中成素服何處奠清尊尚憶  
垂髫日猶居舊藿園先博士別業吟詩同過末好句屬閨門  
織錦何難並飛凰庶足倫自歸海昌邑早天尚書孫一  
哭終顛顛平生寡笑言長齋勤繡佛淡坐倦開軒執節  
無中壽含悲下九原姑嫜哀主婦宗黨惜□□引緋嗟  
何及傷心不可論浪遊經歲月歸路阻湘沅縱有鄉關  
夢難逢月夜覓遺孤方總角讀禮罷吹壘淡望承家器  
毋辜罔極恩慰予惟爾輩早夜待飛翻

同里雜詠

樗叟高文實夙根濡毫滾滾即千言廿年師事長三拜

豈為祇林望獨尊古南老人

朔方旌節昨年還脫帽看花暫閉關敏捷著書垂不朽

須知倦圃是名山曹秋岳夫子

周郎好禪兼好酒醉後高談何太狂長把寄來詩過日

愛君風格近襄陽周青士

吾鄉風雅推朱氏相國諸孫爾最能載酒朝過問奇客

焚香夜對讀書燈朱子容

戲言徐庾是前身爾我同誇麗句新亦識壯夫輕小技

為傷宮體絕千春錢爾載

山桃繞屋春全放羨爾看花策杖行盡日苦吟腰太瘦



至今贏得斷垣名沈山子詩有梅花高館落春草斷垣生句傳誦吳越間以沈斷垣呼之

馬頭舟底費吟哦朱十詩名到處多湯興偶題長短句

也如供奉憶秦娥錫

吾宗詩派啓吾鄉司馬郎官昔擅長後代即今誰最傑

東鄰一叔有篇章從叔明遠

梅花溪上王方伯邁人先生老去新詩律漸高令子將車隨

節鉞淵源近亦善風騷滋萬

俞繆詩篇富滿車右吉天自兩人同調且同居竹林數過能

文士城北翩翩有二徐敬可勝力

閣如說爾游江浦橘叟遙傳八月書寄我沈鍾武功遺廣漢

集序老成又勝別離初徐初鄰

故人高沈才名好念祖馨聞聞道聯翩別帝都積得賣文錢

幾萬待子歸索付當鑪

雕鞍看徧洛陽花游子經年不憶家吳虎文令弟公車今

北去同甫西堂夜夢句應誇

橫山盛八好男兒門掩蓬蒿慣賦詩愧我才名未皇甫

題君賣藥故遲遲南巢所著有賣藥集索子為序尚未得報

鄭生風度亦翩翩愛學韋儲在我先懶惰撚鬚詩句少

吳江楓落儘堪傳隨始

伯氏論文薄盧駱仲兄肆力法歐陽越人浪說三珠樹

小弟飄零學已荒

艷情

手擎盤龍鏡妝成整鬢鴉蛾眉不自畫留待壻還家為  
見雙飛燕因攀並蒂花含情閨閣裏所惜是春華

春日對雪

春序已過半輕寒猶滿庭雪花多帶雨落地即無形易  
聚陰雲黑能滋芳草青祇愁桃李放一夜欲飄零

星回詞五首

南詔野史載皮羅閣建松明樓誘五  
詔至將殺之以并其地鄧睽詔妃慈  
善獨有先見沮行勿聽乃約鐵釧於夫臂既逞  
果焚死各詔屍莫可辨慈善因釧識骸負而歸  
葬南詔以為賢將娶之不從引兵圍其城慈善  
堅守三月食盡死滇人每歲六月廿四日書作  
醢會食怨南詔之不仁也夜執炬相照又若招  
魂者然傷五詔同焚與慈善執節也至今相傳  
為星回節他志所載與野史殊今即  
土俗以詠其事亦巴蜀竹枝之意云

明儔雜坐會高樓無藉雕盤進百羞生啗羶肩傾大斗

人人俱似舞陽侯

夔女巴童執炬來紅光萬點射樓臺不知風俗蠻中異

定作將軍夜獵猜

銅柱盤桃阻一隅五華歌舞亦須臾居人莫恨松明事

蒙社雄風今有無

五詔君臣同日死千年父老至今悲錦袍金印埋荒草

此夜招魂知不知

獨閉孤城不解圍葡萄江上慘斜暉哀牢賸有星回節

傳說多因鄧睽妃

高堂懷家兄武曾二首

桃葉渡頭別秦淮花正疎後先分驛路南北異舟車萬

里思荆樹三年斷鴈書今游夜郎道消息定何如  
高堂髮半白六十是明年好挾姜肱被同歸范蠡船課  
兒饒舊帙奉母有山田只恐投車轄霜臺主道賢謂曹中丞

澹餘

六月晦日對菊

曲沼芙蓉弄初歇小山桂樹香未發雨中叢菊數莖開  
著屐驚看下階滑竹裏松邊朶朶藏幽蘭九畹失芬芳  
此時先浥朱明露他日仍陵青女霜故園東籬未應早  
落英莫采悲將老舉觴對花花自鮮將花解愁愁不掃  
況經為客倦登樓醉折繁枝插滿頭悞疑今日重陽節  
不信明朝七月秋

履畝雜詩

滇中大水護軍陳伯舉往視邀予偕行繞昆明之四部或止精廬或宿民舍越

七晝夜而事竣途次口占絕句故不倫不次焉

春時踏青處今日可登艦桑田為海水豈但見麻姑  
三載不乘舟乘舟如故鄉飛鳧觸蘭漿只道是鴛鴦  
身上無完襦鳩形少生氣哀哀訴馬前黔國舊中尉  
士卒擎鷄子俱控大宛馬高原見鷓鴣馳騁斜陽下  
南壩連百家家家賣麥酒夫壻晚不歸當壚皆少婦  
挾彈打棲鳥啾啾繞樹柯須臾葉盡落贏得月明多  
水決方築隄築隄民勞苦良田殫為河隄成亦何補  
連船裝巨石挂席指城東借問此何用言供兔苑中  
迢遞望前村黃昏猶策轡忽聞清磬聲知到曇花寺

田高農自喜不在水災中因慶秋禾好焚香賽晏公  
伯兄斯年再遊嶺南奉寄

未倦登臨興珠江今再游經年無煖席強半在孤舟卑  
溼連潮汐微茫帶女牛若從始興過涕淚詎能收先君子不

祿在韶州客邸

驅車過大庾夾道荔枝香臨海思飛將登臺弔粵王吾  
曹愛游覽事業在文章莫使歸來日徒多陸賈裝

送礎臣歸太湖

我欲辭金馬君先歸洞庭秋風垂橘柚七十二峯青且  
去尋香草無妨醉綠醞河梁一分手惆悵獨飄零  
菊苦荒三徑鯖宜厭五侯壯心終不死絕徼豈能留爾

我看雙鬢山川賸十洲擔囊俱未倦把盞莫深愁

不為高堂養誰輕萬里來經年采藜藿故國長蒿萊沮  
溺田猶在求羊徑且開況依慧山麓摘菊釀新醅

逆旅終朝其他時恐別離長言出巴蜀相約上峩嶺天  
末非吾土秋深忽路岐願遲十年後重與向平期曾期礎臣

由滇入蜀登峩嶺山而還

右軍餘舊宅宅左是君家屋繞千竿竹庭開幾樹花具  
區原近郭樵李易通槎儻果比鄰約同栽五色瓜

九日登昆明城樓

城上浮雲接大荒山川終古自蒼茫清秋欲盡憐重九  
遠客憑高愛夕陽鼙鼓十年銷戰伐閭閻萬井固金湯

昆明天險那能似鑿向秦中笑武皇

上讀曹澹餘先生集賦短章奉寄兼謝點定客滇近

詩

青土多良材誰為典型者先生人中豪扶衰振大雅底  
柱障百川狂瀾無傾瀉從天墮夜珠光芒燭四野梧臺  
有片石慚愧不堪把

壯麗帝京詩瀟灑黔中吟正聲一何多被我龍脣琴冷  
冷宮商殊乃是太古音清風灑虛室申詠得所欽雖無  
陽春和庶知作者心

聚藻生參差託根澗中石采之不盈簪持獻誠所積豈  
如蘭蕙花含馨美人側何意盛筐篚舉手煩選擇一朝

發華滋枯榮異今昔

借陳伯舉過曇花寺

精舍何年築蒼松一徑深解鞍眠倦馬倚樹數歸禽香  
積烹葵獻山僧策杖尋片時城市隔已覺滌塵襟

夢周林於鄭文谿

同上蘇州女子船清溪夜別柳陰邊忽經三載相思苦  
故夢能詩兩少年

觀獵

高秋射獵南山下出郭旌旗十里長大將自橫赤羽箭  
偏裨俱控紫游韁峯前纔見驅馳散帳外俄聞割炙香  
自笑書生惟袖手翻令美味得先嘗

自笑送劉秀才歸河內  
天末方沍寒我作尋陽客邂逅如平生談讌樂朝夕駕  
言並轡游清嘯發越石雪飛鳳梧山素影搖廣陌陽月  
正溫和梅花動春色花下彈素琴忽作懷歸吟牽裳不  
忍別握手登高岑望望孟津道冰結黃河陰迢遙幾千  
里南北分辰參良覲復何時離懷實難任

謁諸葛武鄉侯祠

天末新丁部來瞻丞相祠南征嚴壁壘北伐慘旌旗揮  
羽崇遺像摩厓失舊碑清溪采蘭杜一薦帝王師

答李亦臨孝廉途次見懷

雪溪山郭裏僵臥似袁安正憶故人別流澌渡馬難征

途當暮節飛鴈落江干忽枉青蓮句殷勤持歲寒

離別尋常事其如良友何人歸燕市遠路遶楚山多緩  
轡看楓葉摩厓拂女蘿此時相憶苦覓夢越江沱

辛亥除夕和十唐人詩程石門倡

客中頻改歲衣袂暗生塵又畢三冬事驚逢四海春雪  
消殘臘盡杯泛異鄉新菽水承歡志纏綿憶老親

駱賓王西

京守  
歲韻

天末倦傭書依人又結廬年華今夕換音信故園疎往  
事何堪憶新愁未肯除笙歌醉後聽彷彿在清虛

孟浩然歲

暮歸南  
山韻

歲晏淒涼夜山城雪作花天寒聊伏枕酒醒忽聞鴉風

暢吹難定明河望欲斜雞鳴還起舞腸斷客天涯杜甫杜位

燈暗青桐几花淡白板扉經年忘汗漫此際易懷歸頌丁仙芝京

中守歲韻

日薄虞淵盡殘冬暗裏催玄冥將臘去好鳥逐春來旅食長如此浮生能幾迴到明傷老大羞見隔年梅王諲除夜

韻

元戎開別館酬酢最相親斗柄斜當戶花枝近向人賓朋新識面書卷舊隨身坐送嚴寒去湖山到處春戴叔倫除

夜宿石橋館韻

家庭今夕會妻子意如何定有淡閨夢飛來絕徼多擔

囊游慘澹挽鹿事蹉跎頃刻青陽至朝昏莫浪過劉禹錫歲

夜詠懷韻

自客尋陽郡寂寥無所聞百旬耆舊隔兩地歲華分子

九月別昆明諸子之尋陽尺素傳雙鯉離心逐片雲五華風景異良

會羨諸君曹松除夜韻

仲氏黔陽役裁書寄我頻遭迴千里夢憔悴四方身寒漏還催夜晨鐘已報春朝來各相憶俱是倦游人韋莊歲除

對王秀才韻

歲歲當除夕愁多淚暗傾況聞烽火接徼外戍頻更草檄慚袁虎尋山暮向平擁衾時反側數為問天明羅隱除夜

韻

香草居集卷二終

*[Faint bleed-through text from the reverse side of the page]*

香草居集卷三

詩三

憶昔歌送朱丈湛侯歸里

嘉興 李 符 分虎

憶昔梅花溪上宅總角陪賓早相識  
世事滄桑十數年君作葉榆五馬客  
布衣吹簫滇市東曾題尺素託飛鴻  
使來遺我青玉案我亦報爾芳蘭叢  
陽春相遇螺峯下知君左遷郡司馬  
昨日封還大守章今朝將返山陰野  
點蒼山石隱畫圖曾無一片攜歸途  
昔賢猶載鬱林石如此清風今有無

楊升菴先生祠



憶昔康陵初新都擢高第校書登木天淋漓玉堂製忽  
攀鼎湖髯再事嘉靖帝議禮隨相君堅引定陶例痛哭  
奉天門詔下金吾繫謫戍漆齒鄉束馬衝炎癘窮愁但  
著書博物乃夙慧瘞筆成高塚鏤版貴荒裔倡和得張  
含壚頭酒頻貫繁華錦官城草玄閣久閉香閨勞寄詩  
未暇敦伉儷古來南流者多在夜郎地開元供奉後近  
代文成繼同爲放逐臣公也更迢遞坎壈幾十秋屈指  
不堪計我來瞻舊祠憑弔煙雲際澗徑游麋鹿短牆纏  
薜荔灑掃勤老僧伏臘土人祭戎馬昔縱橫爭戰無寧  
歲碧瓦金銀宮劫灰榛莽蔽棟宇獨無恙疑有山靈衛  
延佇懷遠哲流風未衰替朗讀招魂篇白日欲西逝

臨漪草堂雜詩

十畝無多地林泉結構新亭臺雖近郭風景別生春樹  
下看蒼鶴池邊釣錦鱗熟游諳曲徑不問灌園人  
柳暗方塘土山禽無數啼春陰多積雨水草欲平隄客  
至流觴坐詩成選石題蕉林幽絕處更在畫橋西  
浦側山桃樹橫斜舊日栽鏡搖花影亂壁似畫屏開活  
水斜衝檻閒雲細墮杯捲簾山色近青翠欲飛來  
百卉參差發迴廊到處遮衆香渾撲鼻未辨是何花繞  
砌游蜂亂衝簾語燕斜淹留不欲去問字一侯芭  
初夏晝陰陰芳菲何處尋千章新綠暗一徑落紅淡出  
檻攀嘉果橫窗弄短琴琴聲雜松響如聽老龍吟

香草居集卷三  
二  
滇花無定準梅萼盛秋柯東閣啓何早南枝開更多微  
風動香片晴雪灑鳴珂粉蝶疑春到牆頭處處過  
樂部小童清吹笙似鳳鳴開元餘舊曲子夜變新聲銀  
箭催人散天街正月明不愁逢醉尉候騎送宵行  
籬菊花全放木犀香尚聞賦詩招隱士落帽得參軍勝  
賞論懷抱平生在典墳從遊今有託未擬退耕耘  
雨雪淡寒夜雲林積未消白連方吐月青隱欲抽條竹  
葉千尊熟桃花片紙招只須扶屐到不似剡溪遙

送許爛石歸吳

邊柳青青花欲飛故人花下換征衣可憐萬里傷心別  
翻恨三春見面稀吳苑莫愁松菊老楚江須采杜蘅歸  
年來傳說吾鄉事水旱憂農信是非

夢歸故園作

我有由拳宅遠在東海隅開扉臨碧水千頃鴛鴦湖舍  
之萬里游三歲有六月比來鄉思淡清夢亦超忽茫茫  
渡江漢瞬息達故園岸傍花亂發彷彿對春溫入門但  
疾趨上堂拜吾母懷揆滇池蓮長跪爲母壽母手持蓮  
花置之繡佛前粲然顏色喜如彼麻姑仙病妾見我歸  
攬鏡整簪珥癡兒見我歸抱書問竒字家人語未畢戾  
止平生親怪我風塵色仍是吹簫人四坐盡挪揄一去  
不復顧覺後疑爲真大笑世眼誤尼父有遺訓富貴如  
雲浮內美苟無虧顛顛何足憂今也殊不然結交重金

香草居集卷三  
三  
帛吾鄉多素封對面九疑隔因之遠行邁經年別吳關  
願得臥舊廬夜夜夢中還

舍弟書來促予早還因寄此詩

我生既寡諧浩蕩誰能束被褐辭衡門渺然越南服周  
覽歷諸郡三見芳草綠跂望勾吳鄉繁憂亂心曲飛鴻  
墮青雲素書在其足一尺桃花箋百行字盈幅期我早  
旋歸鵲鶴義誠篤行旅非好勞豈不念松菊苟得全令  
質何妨淹征軸萬里猶比鄰斯言可三復

題且閒齋壁

書屋橫窗護碧紗良辰淡坐寂無譁玉鞭肯換來禽帖  
磁碗貪嘗日鑄茶松下科頭聽啼鳥池邊袖手看栽花

尊前有客疎狂甚爛醉高眠不憶家

聞亦臨已抵都門因寄

聞道春殘歸玉河門前淡柳葉如波詩投錦篋應無數  
書換籠鵝又幾多苦憶良游成夢寐生憎索處在山阿  
懷人獨對清秋月忍聽高天唳鴈過

懷化南

揮手津亭別秋風又一年去尋江令宅幾泛鄂君船玉  
笛紅牙拍銀箏白紵絃重翻新樂府知有莫愁篇

遙和星巖雲壑春日過韓非有新城別業三首

石徑沿溪水村居傍竹籬三春宜賞讌五畝足棲遲邀  
客開新釀穿花礙接羅遙傳故人詠想見弄杯時

多君愛朋好風雨亦開關地僻林泉潔時清部曲閒攜  
琴援古調抱膝看前山第五橋邊景於今在百蠻  
邱壑此中勝圖書暇日看倦騎驢馬狂脫鷄鷄冠官  
俸貧能繼茅齋儉易安何當扶蠟屐百日與盤桓

臥廬見梅花因憶故鄉朱園栽植之盛輒賦四韻

寄元臣辰始兼懷蔣曾策孔懋弘定夫兄弟

滇梅一樹新人眼忽憶吾鄉太守園十畝淡林看最好  
此時香萼放應繁遙知二妙開書屋定與羣賢弄酒尊  
攀折無由逢驛使東西怨別各銷魂

挽張晦先入覲回黔卒鎮遠旅次三首

朝罷明光殿南天一再游清秋悲薤露寒月慘江樓草

聖他年貴遺文使者求焦溪關下路從此是西州

遠服衡文使先皇折檻臣諫書猶在篋絳帳已生塵

夙昔賓朋在天涯涕淚新最憐丹旆遠寂莫返漳濱

九原不可作千載或垂名在日耽詩句從來澹宦情隨

身惟弱女痛哭有門生賢者竟如此吾將叩玉京

關西老將歌

關西老將昔少年梁州鐵甲渾身纏上馬殺賊血成川  
張弓瞋目倒應弦有時矢盡張空拳猶能格殺敵數千  
遠走兩粵楚蜀滇南窮文趾西于闐身經百戰介冑穿  
矢志直欲圖凌煙王師十萬壓南天倒戈解印歸爭先  
大者封侯北入燕小者建節乘樓船嗚呼老將無金錢

葛勒山下今種田寶刀繡澁鬢皤然

讀張禹山詩名含字愈光永昌孝廉

盛覽尹珍俱寂莫千秋風雅歇滇黔若看前代論才子

三百年來一孝廉

北轍南轅幾十春晚年詩律益精神識得慶陽能北面

成都自是比肩人愈光學詩空同之門與楊升菴倡和最多

寄懷茂斯補山約山諸叔及天穀兄

吾族人才盛相依樵李城門庭今冷落強半四方行文

采看諸叔飛騰望一兄我游遲未返不是薄功名

胡公西征奉寄

城上吹笳歇前鋒鐵騎隨拊循勞主將奮勇樂王師帳

外聞清嘯軍中正賭碁先聲馳滴博知道小昆彌

贈鳧菴從軍

國士王門客從戎亦遠征銜杯多慷慨下筆忽縱橫但  
得馳飛箭何須事請纓掀髯能料敵遮莫笑書生

金沙聞捷紀事五首

蘭州西去動妖氛五翎憑陵縱馬羣毳幕竟侵都護治  
犀渠直逼貳師軍沙場一望春雲暗羽檄交馳午夜聞  
麗水從來限疆土胡為蛇豕忽紛紜

西戎亦解造戈船夜渡瀾滄盡控弦自有奇兵能拔幟  
不愁衆騎可投鞭漢龍無復聞枹鼓亞旅何曾廢力田  
獨惜防邊諸將士三春不脫戰袍眠

香草居集卷三  
南服□□西出師親提十萬虎賁隨未聞繡纛過龍首  
已報金沙走月氏幕府頻歸強弩將平原早散射鵬兒  
三軍醜酒更相賀談笑從容倦旆旗  
無數材官擁鐵衣參差虎帳對斜暉冠軍大帥虛籌策  
博望偏師已破圍可跋東連洱海靜葉榆北去塞塵稀  
不勞使者通西域生獲蒲梢萬匹歸  
太白星低殺氣消戰場但見草蕭蕭烏孫一去銷金甲  
蠻詔何須斷鐵橋料敵曾聞終給事論功獨賞霍嫫姚  
即今擊柝邊城遠會見諸羌附 聖朝

詠竹

駐我長征白鼻騮坐來別館對鶯花修篁清響因風起  
曲徑低枝拂檻斜康樂山居全在眼王猷遠客暫忘家  
科頭散帶獨長嘯但少門停嵇阮車

送叡泌北遊

遠道男兒志那能無別離獨憐相見晚又值送行時沙  
暗居庸塞雲深督亢陂此中盛游俠定得結新知

送許鶴沙觀察歸養

匹馬返雲間風塵孝子顏千鍾供祿養不換舞衣斑琴  
鶴攜歸棹鶯花滿故山我家三泖近客夢逐君還

郊外觀荷遇雨二首

行到橫塘露已晞風搖菡萏暗香微褰裳欲采雨飛急  
荷葉蒙頭不溼衣

香草居集卷三  
蓮房的的葉田田恰似江南六月天山雨分明催弄曲  
恨無越女蕩蘭船

阿裨詩

阿裨者元梁王柏匝刺瓦爾密一稱孛羅女也妻大  
理平章段功同居善闡梁王聽讒復疑功有異志密  
授孔雀膽與阿裨令毒殪功阿裨具以情告促之西  
歸功未信明日梁王邀功東寺演梵命番將殺之阿  
裨聞變將以身殉梁王防衛備至遂悲憤作詩曰吾  
家本住鴈門溪一片閒雲到滇海心懸明月照青天  
青天不語今三載欲隨明月到蒼山悞我一生踏裏  
彩吐嚕吐嚕段阿奴施宗施秀同奴互雲片波潏不

見人押不蘆花顏色改肉屏獨坐細思量西山鐵立  
霜瀟灑踏裏彩被也吐嚕無知也押不蘆西域返龜  
草名肉屏橐駝也予讀其詩哀其節遂用其韻以弔  
之出語之不甚雅馴亦如原作未嘗求工也

梁王昔忌段平章阿裨勸之歸洱海鴆毒不行莫邪利  
到今三百有餘載毳帳哀吟泣如雨珠璫匳葉沉光彩  
棘纍猶傳吐嚕詞沙儂也說孛羅互我憐節比西山松  
萬古青青長不改孤墳何處埋香骨煙迷荒草悲風灑  
武曾二兄久不得予消息賦四絕句見寄依韻奉

答兼訂明秋歸里之約

東望故園雲樹迷秋來定憶梅花溪爲憐少弟遲消息

一片離情又向西

弄棟銀生早倦游曾題尺素說新愁莫怪南禽銜不到

危峯愁絕永寧州滇黔孔道惟關索嶺最高在永寧州治

倚閣望遠日徘徊每寄花箋手自裁萬里鱗魚經歲達

一封書信兩鄉開家慈每寄書至滇必與示兄札合為一緘

吾兄秋錦多佳句予亦吟成一卷詩約束琴書好歸去

莫令又過菊花時

雜感

客遊無定踪來此異鄉縣春往復秋來流光疾於電草

木忽萎黃搖落滿郊甸肅肅天始寒藏我白團扇憂來

固無方豈惟感物變美酒雖盈樽強酌不終宴

丈夫志四海桑麻非安宅天地猶彈丸胡為悲遠客遠

客未足傷所嗟無樂方內顧迫婚嫁外處乏餼糧采菽

聊為餐斧冰持作漿朝尋沮溺儔暮逐遊俠場浮沉且

隨時遲遲謝塵韉虛已以游世遺訓師蒙莊

束髮事詩書矢志慕管葛十年困蒿萊被服但短褐出

疆秉耒耜行行望城闕第宅何縱橫高臺陵木末中有

四方人挾策競干謁連袂即成帷肩摩無停轍時俗尚

吹竽我乃獨操瑟同舍不相知邈若秦與越浸灌笑時

雨爍火混明月慷慨發長謠中情誰能察

少年慕繇華春服被輕綃方舟駕蘭漿置酒臨江皋環

坐多美人嫣然如二姚纖手白無瑕為我奏瓊簫頽陽



香草居集卷三  
九  
倏西逝歡愛不終朝朱顏非昨日齒髮亦已凋娛樂且  
顛顛憂心沉怊怊人世苦混濁羨門寧可招安得彭涓  
術天上永逍遙

丹山三鳳鳥比翼棲梧桐羞與燕雀羣翩翩各西東相  
去萬餘里飲啄難相從所食無琅玕毛羽猶未豐東顧  
夜郎道南望羅浮峯悵恨歸來遲有母勞尸饗干祿爲  
親屈宿昔志願同豈知乘風意至今悲道窮

有女若江妃獨立河水濬文贈白玉環蹇修前致詞仲  
春冰始泮桃李東風吹我馬玄以黃駕言忽西馳盈盈  
天漢水悵望隔南箕烏鵲不爲梁何以成佳期盛年欲  
遲暮延佇心傷悲

中天高太白烽火動邊城西戎爲我仇大將得專征兵  
事尚神速部曲寂無聲白日墮原野但聞戰馬鳴況當  
十年交朔氣凝旆旌角弓勁如石寶刀不可擊從軍雖  
云苦旦暮立功名舍我舊縫掖望闕請長纓荷戈力不  
及又恐負生平馬首靡所託岐路空屏營

羅浮有仙人遺我龍葱榦裁之爲長笛律呂若條貫正  
響激林表鳳凰鳴天半濮上盛弦歌新聲日靡曼聽者  
惑荒淫傾耳動嗟嘆世俗多昏迷寧知我所患知音二  
三子迢遙隔雲漢招之未能來孤立被衆訕愁思當訴  
誰鬱鬱處宵旦

我友齒方壯讀書窮周秦操觚薄小技埋照懷竒珍棲

遲衡門下娛樂忘其貧疇昔心相知同調發陽春金石  
未爲堅約結爲婚姻越鳥不雙翔飲啄違故林經年嘆  
離析君爲泉下人公輸旣長往匠石當輟斤生芻遠莫  
致揮涕登城闈南望孺子廟北接梁鴻墳荆榛蔽千古  
高節誰等倫爾魄居其間九原庶得鄰

渡水策青驪涉原操蒙衝少壯一失足垂老將焉從俠  
客舍七首束手難樹功王孫泣岐路不如田舍翁狀貌  
若至愚俛仰拙爲容邦族且相棄何況行路中朝詠伐  
木詩暮乃賦谷風我無千黃金結交安得終

九日哭沈武功四首

蕭條菊花節忽訝故人徂衆客方高宴傷心獨向隅狂

吟無爾在寂莫鴛鴦湖遲踐結鄰約平生負酒徒  
君年未三十多病久清羸知己先零落有懷當訴誰修  
文千載逝作誄幾人悲身後留名處淒涼數卷詩  
萬里登高望吳關幾月程寢門那可見遙哭不成聲細  
雨逢愁落淡杯帶淚傾檢君舊時札重製錦囊盛  
生時挈尊酒送我入南天不信東門餞竟爲長別筵孤  
兒猶襁褓寡鵠倍哀憐渺渺重泉下招魂何處邊

中秋遇雨

斜日西沉暮靄生主人張宴此山城滿堂絲竹邀明月  
翻雜蕭條秋雨聲

賓朋醉止朱顏酡屢舞僊僊詩思多獨有江南未歸客

香草唐集卷三  
十一  
當筵興盡賦明河  
故國風雲萬里殊  
今宵未必月全無  
醉眠儻有還鄉夢  
只在西湖與鏡湖

過聖延寺

尋陽古寺踞高岑  
聞自齊梁直至今  
幾遇亂離還在眼  
重栽松柏已成林  
我憐名勝徘徊數  
僧話興亡感慨深  
愛食秋瓜香積饌  
斜陽不覺又西沉

秋雨

五里山城暗陰霾  
秋後多飛來數峯  
雨搖落一溪荷靜  
几翻書倦高門少  
客過遠看鷗鷺下  
對對戲清波

尋甸州雜詩

新丁非舊日極目總含愁  
疊嶂全無樹清川不見舟  
人家連草屋阡陌臥封牛  
倦客依人住翻然悔遠遊  
尚憶安楊叛殷憂起廟堂  
臨軒命司馬秉鉞向蠻方  
甸海孤城陷將軍一戰亾  
淒涼憑弔地衰草共斜陽  
象教通西域遺風佞佛真  
香林游士女須達布金銀  
花供青蓮潔經馱白馬新  
只愁廣文館煙雨閉荆榛  
物產茲鄉好無如千歲苓  
生成如偃蓋聞說可延齡  
午市山城集秋風賈客經  
吾將辟嘉穀服此誦黃庭  
莽莽月狐北榛蕪望不分  
白龍餘舊洞神雀竟無聞  
徑滿千林葉峯迷萬古雲  
蕭然隔塵世麋鹿可同羣  
木龍村最好十里栗園通  
結實三秋滿封侯千戶同蒸

香草居集卷三  
鮮嘗主客落葉掃兒童卻勝荷鋤者辛勤隴畝中  
守戍三千士秋衣舊戰袍癸庚呼不諾戊己望頻勞野  
外擊飛鷄壚頭典佩刀更憐紅叱撥驤首對空槽  
車湖一片碧小艇蕩清虛映水芙蓉少環山木葉疎遠  
游來澤畔何日返吾廬且學任公子臨流釣巨魚  
昔日烏蒙部通財食貨兼百金朱汗馬一斛水晶鹽互  
市鄰封禁登壇節制嚴至今椎結輩不過蜀山尖  
狐鳴時嘯聚歲晏四郊多羽箭深林伏囊金快馬馱戍  
樓嚴擊柝裨將遠橫戈客眼愁看此鄉關近若何

錢秀才過宿書齋小飲

忽枉洛陽客銜杯便脫冠風多燈不定雨過席生寒亂

帙爲高枕秋花當夕餐向來羈旅思今夜對君寬

夜集汪記室齋

深巷柴門迴幽然暮景佳月明不到地樹影恰橫階求  
仲時來過元卿或可儕酒酣隨意舞忘卻在天涯

秋夜獨坐書懷

獨坐情難遣頻聽戍鼓殘燈花任開落珠斗忽闌干客  
夢還鄉易荒城得友難淒涼今夜月舉首共誰看

蓮

玉井仙人植花開十丈身何年移絕徼盛夏滿通津蕩  
槩思吳女爲衣學楚臣如船藕可挾歸種太湖濱

壬子冬接斯年大兄粵東書兼示二詩乃庚戌客

香草居集卷三  
三  
濟南作也

宛溫山下雪消初一紙平安慰索居千乘早題春草句  
三年纔附廣州書更聞溪上添茅屋好及花前挽鹿車  
莫忘朱陵掇仙草歸供慈母當園蔬

書中言買宅東溪  
將於明春旋里

除夕前二日詠瓶中梅菊

歲晚寒淡未到春瓊姿霜質折來勻陶家三徑真高潔  
合與孤山處士鄰

酬吳東池司李

吳郎生吳而長楚童年解讀楚離騷五經紛綸榻欲穿  
腕底寫禿千兔毫放情不耐執手板謝去祿米恣遊遨  
昨乘款段將軍門客館相逢解佩刀青軒晚開對清酌

小窗書案停琴操興酣灑筆墨汁勻贈我佳句真絕羣  
藏之懷袖歸海隅詠君之詩如見君君家呂公灘清流  
鑿毫髮東通浙江潮朝行夕可越黃山三十有二峯峯  
峯蒼翠能突兀浮邱石壇凌樹杪煙雲幻出金銀闕芝  
草碧色丹砂紅我將訪此仙靈窟青鞵布襪於其間遲  
爾還山弄明月

答又元見懷

斑管新題白團扇遺予佳句近青蓮好將金翦三行字  
譜入雲和五十弦

簡雪懷

百里山程新雨滑未堪走馬向滇池春深苦憶上元夜

酒讓屠蘇沉醉時

香草居集卷三終



